

國朝柔遠記



國朝柔遠記卷十一

臣彭玉麟恭定

臣王之春敬編

夏五月英俘啞噶等伏誅

先是淡水雞籠海口擒獲英人總兵達洪阿兵備道姚瑩將提郡查訊因嘉義匪徒滋事暫停及事平仍分起提解來郡委臺灣知府熊一本知縣閻炘帶習英語之宋廷桂何金逐一研訊將奏誅之復奉

上諭御史

福珠隆阿奏請暫畱罪夷以便解省訊究一摺臺灣擒獲逆夷多名如果尙未正法卽著劉鴻勳飭令達洪阿等按照該御史摺內所陳千里鏡一節毋庸查究外其

餘逐層究詰明白曉諭務得實情密籌辦理冀有裨益
於攻勦機宜姚瑩覆奏畧云臣等欽奉 諭旨後復加

研訊據黑番頭目咱荊啞等供稱伊等均紅毛望結仔
吡勝油各島人駕夾板洋船向屬英人管轄每年俱納
鴉片煙土爲貢稅前年中國查禁煙土無從銷售英王
遂索納金銀各島亦因煙土難銷無金銀供應仍求收
納煙土英王卽於檳榔嶼望結仔實力等處雇調兵船
七十餘隻在孟加刺會齊大船用八九百人小船五六
百人每人月給番銀四五圓至十餘圓不等又漢奸數
人沿途賣貨買物供用令大頭目帶各船至中國與領
事義律求通商因中國嚴禁如初卽帶各船至虎門舟

山廈門等處滋擾去年英王撤回義律另以璞鼎查爲
領事大頭目隨派三十餘船攻廈門續派二十餘船再
攻浙江又派伊等三桅船三隻來臺窺伺伊等船於八
月十二日晚先到雞籠外洋其同來二船不知何處阻
停伊等遂於十六日駛入雞籠口與官兵開礮相攻被
岸上礮擊倒大桅伊船立破船中番官三人一名可失
萬一名巴刺不一名龍不奔見勢危急一於拜天後跳
海一傷目其一同白番數十黑番三百餘及漢奸數十
分駕杉板船四隻逃走官兵乘船追至諸夷或投海死
或被殺死伊等均被生擒船上大小礮三十餘門及藥
彈金銀器物俱各散失此該夷船聽從英逆各處滋擾

來臺被擒原委也詰以漢奸姓名里籍據稱漢奸俱粵人前英人在廣通商與管事白番相識是以雇在各船照料伊等實不知其姓名詰以製藥製礮該逆能否造辦據稱火藥船隻俱在本國及息辣製造礮用銅鑄伊等但能用藥點放不能造辦詰以硝磺米石由何處偷漏所需內地何物接濟畏懼中國何項兵法據稱硝磺米石俱由息辣孟加刺等處運來或各處漢奸接濟船中所帶乾麪粉餅極多非必需內地之物至在中國打仗最怕擱淺是以到一海口必量深淺最怕火攻是以船之兩舷皆用夾木中層注水以防礮火等語臣等復詰以檳榔嶼望結仔息辣孟加刺實力等處是否國名

所獲圖冊番書是何奸計據稱孟加刺實力是英國屬
島檳榔嶼望結仔息辣三處是英國大碼頭在葛刺巴
一帶順風亦須四五月方到中國至所帶圖冊是沿途
各島及中國地圖番書是管船白番甲畢丹之物伊等
黑番俱不識字莫能解說等供再三嚴詰矢口不移臣
等查該逆番等因天朝不准販賣煙土輒聽英人調派
分至各省滋擾實屬罪大惡極若如該御史所奏解省
審辦非惟現乏文武官兵護解過海且此項黑番俱各
島烏合愚蠢之人問以祕要情形不能明晰且恐洋面
番船聞而截奪應否仍照臣等原議卽在臺正法以彰
國憲而快人心抑如該御史所奏暫緩正法之處臣

等未敢擅便尋奉 旨將頭目監禁畱存聽候諭旨其餘概行正法於是將雞籠擒黑番一百二十三名除受傷在途在監身斃外又畱存頭目咱莉啞哈叻叻噶二人其餘望葛等一百十七名斬決又將大安生擒紅白黑番四十九名解郡訊供後亦畱存紅番頭目顛林大夥長律比二夥長吧底時三夥長科因諫呢副頭目怒文白番頭目伊些駱黑番頭忍滿七人其餘紅番脫哩等三名白夷密林等十名黑番伊騷等二十九名悉誅之

英人陷寶山江南提督陳化成死之

寶山城東南爲吳淞黃埔交匯入海之口實爲上海崇

明管鑰洋面寥闊不如口內之東溝江灣可設伏火攻
惟東西礮臺有礮三百餘又海塘高厚礮不能透塘上
土堆如雉堞可蔽身小沙背則塗灘峭岸險亦足恃江
南提督駐松江府陳化成莅任六日而定海警報至遂
馳赴吳淞口相度形勢建營於海塘高岸激厲將士拊
循軍民冬則踏雪巡營夏則海潮盛時水深及尺未嘗
移營及乍浦失守江浙騷動總督牛鑑駐師上海有兵
三千籐牌八百化成恃以無恐是月三日英火輪船四
由外洋採水入輪煙蔽天鑑驚疑束手適奕經檄令權
宜設法羈縻之遂遣弁齎禮物赴英船不答初八日英
船開礮化成亟麾令然礮沈其二艘又折其二艘之桅

斃英兵三百餘人鑑聞之喜出寶山南門登塘觀戰適
爲一飛礮驚退滁州兵在後者走河南徐州兵皆潰總
兵王志元亦走英兵遂由小沙背登岸化成前後受敵
中礮死東溝江灣之兵同潰英兵遂入寶山牛鑑走嘉
定自丹陽句容回江甯武進士劉國標負化成尸匿蘆
葦中越十日嘉定知縣練廷璜求得之殯於嚮城民爭
詣哭奠繪像祀之事聞 賜謚忠愍時江浙士民謠

曰一戰甬江口督臣死提臣走再戰吳淞口提臣死督
臣走同化成殉難者守備韋印福千總錢金玉許林許
攀桂把總龔齡增外委徐大華姚雁宇等七人

英人陷上海典史楊慶恩死之

上海距寶山八十里居民聞警卽遷徙文武各官買舟將遁典史楊慶恩聞之求見上官言事不得而返比吳淞失守參將繼倫率兵棄城去兵備道巫宜禊知縣劉光斗先後走松江所募福建水勇乘機焚掠慶恩頓足長歎作牘呈上官竟投筆曰吾亦從此逝矣倉皇出小東門呼扁舟渡春申浦探囊得百錢與舟子其僕意其避去從之舟至中流慶恩突躍入水僕號呼曰此我主上海捕廳也舟子不顧急搖槳去僕求救不得亦走十一日英船駛至上海城已空無人比英兵退慶恩家人求之於周家渡蘆叢中見番尸十餘中有漢衣冠者則慶恩也乃斂以歸事聞奉 旨優卹

英人犯松江府壽春鎮總兵尤渤禦卻之

英人既入上海十三日復以火輪杉板駛至松江時尤渤統壽春鎮兵二千調守松江整陣以待英師開礮渤令我兵皆伏避之礮過而起則我礮齊發相持半日而退次日復至亦如之英人不得逞而返英人又將窺蘇州以火輪船採水至泖湖輪膠於水草乃還遂於二十日退出吳淞口

夏六月英人陷鎮江副都統海齡闔門死之

英人又以杉板小舟擾及無錫界並崇明靖江江陰境鄉民聚眾逐之不勝去遂自福山放洋游弋圖入長江而未測江水淺深沙綫曲折及內地虛實乃劫沙船導

火輪船駛探知各險要皆無備沙港荻洲皆無伏乃決
意深入先是有鎮江紳士請於常鎮通海道周頊以圖
山關江流狹隘可兩岸設防且備火攻頊乃親往相度
形勢紳士爲指陳堵截守禦事宜頊笑曰鋌而走險彼
必不來來則俟其擱淺而圖之若先糜數萬金以設萬
一之防誰其任之遂不設備初八日英船乘風潮直入
進薄瓜洲城兵民已逃盡轉窺鎮江參贊大臣齊慎湖
北提督劉允孝督兵禦於城外相持三日勢不支退守
新豐距郡城四十五里城中守具不備又未團練民勇
相助惟駐防兵千餘綠營兵六百副都統海齡率之以
守初攻不克英人乃佯攻北門而潛師自西南以火箭

國朝文獻卷十一
射入城延燒房屋乘間梯城入守兵皆潰居民紛紛逃出乃焚滿營海齡爲所殺闔戶盡焉項及鎮江知府祥麟丹徒知縣錢燕桂等先後棄城走鎮江素繁富英人積憾駐防焚殺擄掠慘甚甯波寶山

淮揚鹽商賂英師

京口旣失英船礮聲震江岸瓜洲儀徵之鹽船估舶焚燬殆盡梟匪乘間劫掠火光百餘里揚州爲鹽漕交匯自京口逾江沂流止半日程淮南北場運商人惴甚時漢奸謀者揚言英人戒師期將因糧於揚以規取江甯非速備贖城費以求免禍且旦夕至贖城者英人挾兵索賂之口號也商人聞警將盡室行有江壽民素善淮

商門客自請往訶之謀者以告馬利遜呼之入索賂款六十萬壽民請減其半英酋方欲疾趨江甯意不在場許之時淮南皆中落咄嗟莫辦具白於運使但明倫不可商人曰納賂以行成不猶愈於齎糧而藉寇乎明倫嗾哨無以應乃作商人提借之款飭總商具領事後歸償卽日交壽民致送鎮江英船遂於二十八日進逼江甯東南大震

秋七月英人犯江甯耆英伊里布牛鑑與英人成和

英火輪兵船八十餘艘連檣溯江而上自觀音門至下

關

在江甯北河外

烽火照徹城中時牛鑑自吳淞敗還沿江警

報曰亟而不謀守禦

朝廷方厯慮漕運咽喉與沿海

之民已 敕耆英便宜從事羈縻之又英酋已先奉其
國王諭但得他省通商不必更索兵費煙價卽鴉片亦
不再販故在乍浦亦有前往天津求和遵國王所諭之
言而耆英方自浙啟行伊里布亦奉 詔自浙馳至未
敢自專故鑑惟日促耆英之至而飛書照會英酋以

欽差大臣已奉 諭旨允定和好不日可到以緩兵是

月初三日伊里布亦遣家人張喜偕揚商夥詣英船羈
縻之其酋璞鼎查謾語曰耆將軍未知何日到我軍數
萬遠來轉輸難繼方謀就倉城中若欲俟耆將軍速爲
我辦餉糈三百萬治邸舍城中入而徐議可也二人歸
告時壽春鎮兵已抵城下將校陳平川等皆憤怒請決

一戰鑑不許曰然則請閉城登陴而守鑑遽拂衣起駐
防將軍德珠布在座亦拂衣起江甯故南都城守嚴重
將軍錄鑰牡督府有急事亦需將軍令箭然後啟英船
初至德珠布亟傳令閉諸門時居民戒京口焚掠之慘
方遷避去猝聞重閉之令有路藉死及委殯去者鑑與
德珠布交疏相劾伊里布調停其間約以已啟申閉及
敵情叵測鑑猶恐誤撫局不設備德珠布怒卽閉內城
授兵登陴居民益恐時張喜復至英船英人要求各款
一索煙價商欠兵費銀二千一百萬一索香港爲市埠
並通商於廣州福州廈門甯波上海五港口一英官與
中國官用敵體禮餘則劃抵關稅釋放漢奸等款未請

鈐用 國寶喜言煙價兵餉廣東已給過六百萬今索價更奢索埠更多若何馬利遜言此我國所索豈卽中國所許此次通商爲主不重在銀錢但得二三港貿易餘則中國裁酌可也而諸大吏未卽覆初六日耆英入城按各款稍駁詰之適英酋聞增調壽春兵至謂我借款緩師初八日突張紅旂揚言今日如不定議者詰朝攻城意蓋欲款局速成非望所求盡允而諸帥卽夜覆書一如所言亦絕不及鴉片煙禁翼日遣侍衛咸齡布政司黃恩彤甯紹臺道鹿澤長往告各款已代請俟批回卽可定約遂急驛馳奏且謂敵設礮鍾山之巔全城性命在呼吸實則山頂極峻礮無由上且距英船數